



Svana telur ýmsa hagræðingu geta hlotist af útflutningi á hugbúnaðarlausn sem Stiki hefur hannað til að meta gæði heilbrigðisþjónustu. FRÉTTABLAÐIÐ/VILHELM

Hagræðing í heilbrigðiskerfi

Upplýsingafyrirtækið Stiki, sem sérhæfir sig í hugbúnaðarþróun og ráðgjöf, á nú í viðræðum við aðila í Bretlandi, á Írlandi og í Skandinavíu um útflutning á hugbúnaðarlausn sem það hefur hannað til að meta gæði heilbrigðisþjónustu.

Að sögn Svönu Helenar Björnsdóttur, eiganda og framkvæmdastjóra Stika, hefur útflutningur ýmsa hagræðingu í för með sér.

„Með því móti gætum við til dæmis þróað fjölþættara og betra kerfi en við erum með í höndunum. Þetta myndi líka lækka kostnað af notkun þess hérlendis þar sem þróunarkostnaður dreifðist á fleiri aðila. Þetta væri því óneitanlega grundvöllur fyrir hagræðingu og sparnað,“ segir Svana um útflutning á hugbúnaðarlausninni sem nefnist Resident Assessment

Instrument, skammstafað RAI, og Stiki hefur verið að þróa undanfarin ár.

RAI er sem fyrr sagði matslausn fyrir heilbrigðisþjónustu og hefur að sögn Svönu margvíslegt notagildi. „Hana má til dæmis nota til að meta gæði í öldrunarþjónustu, bráðalækningum, þjónustu við fatlaða, heima- og geðheilbrigðishjúkrun.“

Svana bendir á að í víðara samhengi megi nýta RAI til að meta hvernig fjármunum sé best varið innan heilbrigðisgeirans. Til dæmis hvort betra væri að byggja upp 400 hjúkrunarrými eða færa heilbrigðisþjónustu heim til fólks með því að efla heimaþjónustu. „Með henni má mæla hversu þungt fólk er í umönnun. Svo er hægt að greiða stofnunum samkvæmt mælingunni, svo um er að ræða mælikvarða á rekstrarkostnað. Tryggingastofnun greiðir kostnaðinn.“

Svana segir Stika þegar hafa góða reynslu af samstarfi við er-

lenda aðila, svo sem í Þýskalandi og Bretlandi þar sem áhættumatsbúnaður frá fyrirtækinu, svokallaður RM Studio, hefur verið tekinn í notkun. „RM Studio, skammstöfun á Risk Management Studio, er hugbúnaðarlausn sem við höfum þróað og selt í fimm ár og er ætluð fyrirtækjum, stofnunum og sveitarfélögum sem vilja tryggja öryggi í vinnslu upplýsinga. Hún byggist upp á mismunandi kerfis-einingum og er víðamesta áhættumatseiningin sem leiðir notendur á skipulagðan máta í gegnum áhættumatsferlið.“

Svana bendir á að ýmis ávinningur sé af notkun RM Studio; Kerfið spari tíma og auðveldi notendum að skilja kröfustaðla og framkvæma áhættumat með tililiti til þeirra. „Í raun er búið að pakka okkar ráðgjafarþekkingu inn í búnaðinn, sem er notaður til að meta hvernig kröfur um gæði og öryggi eru uppfylltar í samræmi við alþjóðlega staðla.“ - rve

Íslenskt bygg í bjórinn

Í rannsóknarverkefni Matís, Landbúnaðarháskólans, byggframleiðenda og nokkurra matvælaefyrirtækja var kannaður möguleiki á að brugga bjór úr íslensku byggi einvörðungu.

Afraksturinn var bjór sem stenst allar gæðakröfur og hyggst Ölgerðin Egill Skallagrímsson hefja framleiðslu á honum í sumar. „Nú þegar erum við með tvær tegundir sem innihalda íslenskt bygg

en einungis 10 prósent og þorra-bjór sem inniheldur 30 prósent af íslensku byggi en hann er bara á markaði í sex vikur,“ segir Guðmundur Mar Magnússon, ölgerðarmeistari hjá Agli.

Hann býst við að íslenski byggbjórinn verði seldur í takmarkaðan tíma enda hrökkvi íslenska byggið skammt. Segir hann þó hafa einkennandi og gott bragð.

- jse



Íslenska byggið er ódrjúgt en Guðmundur segir bjórinn standast samanburð við bestu tegundir.

Mikilvægi tengslanets

Mikilvægi tengslanets í viðum skilningi orðsins verður til umfjöllunar á málþingi Hugmyndaráðuneytisins laugardaginn 31. janúar. Ekki verður aðeins horft til beinna tengsla einstaklinga heldur þess samfélagssvetvangs sem netið hefur þróað í undanfarin ár með tilkomu vefsíðna eins og Facebook. Margbreytileiki þeirra og virkni verður skoðuð; hvernig þær geta liðkað fyrir samningum, komið vöru og markaðsupplýsingum á framfæri, ásamt því að innihalda þekkingu sem getur skilið á milli feigs og ófeigs þegar lítið er til upphafsára nýrra fyrirtækja, eins og segir í tilkynningu frá Hugmyndaráðuneytinu. Sjá www.hugmyndaraduneytid.is.

- rve

Virkni síðna eins og Facebook verður til umræðu á næsta málþingi Hugmyndaráðuneytisins. NORDICPHOTOS/GETTY



VERKEFNASTJÓRI

Hlutverk NSA er að stuðla að uppbyggingu og vexti íslensks atvinnulífs með því að taka þátt í fjárfestingum í sprota- og nýsköpunarfyrirtækjum. Eigið fé sjóðsins er um 4 milljarðar króna og á sjóðurinn hlut í um 35 fyrirtækjum. Árleg fjárfestingargeta sjóðsins er nú 500 – 600 milljónir króna á ári. NSA á jafnframt tæp 40% eignarhlut í Frumtaki sem er nýr fjárfestingarsjóður sem hefur 4 milljarða króna til ráðstöfunar til fjárfestinga á næstu þremur til fjórum árum.

Nýsköpunarsjóður atvinnulífsins (NSA) leitar að sérfræðingi/verkefnastjóra til að meta fjárfestingarkosti í sprota- og nýsköpunarfyrirtækjum og til að aðstoða þau fyrirtæki sem fjárfest er í við uppbyggingu og rekstur þeirra.

Ábyrgðarsvið

- Mat á viðskiptatækifærum og fjárfestingakostum
- Kynningar á fjárfestingatækifærum
- Seta í stjórnnum félaga sem sjóðurinn fjárfestir í
- Þátttaka og frumkvæði í stefnumótun hlutdeildarfyrirtækja

Hæfniskröfur

- Háskólapróf í verkfræði, lögfræði, viðskiptum eða tengdum greinum
- Reynsla af fyrirtækjarekstri og/eða fjárfestingum
- Reynsla í að greina styrkleika og veikleika í rekstri fyrirtækja
- Sjálfstæði og frumkvæði í starfi
- Mjög góðir samskiptahæfileikar
- Góð tungumálakunnátta

Umsjón með starfinu hafa Hilmar G. Hjaltason (hilmar.hjaltason@capacent.is) og Herdís Rán Magnúsdóttir (herdis.magnusdottir@capacent.is) hjá Capacent Ráðningum. Umsóknarfrestur er til og með 1. febrúar nk. Umsækjendur eru vinsamlega beðnir að sækja um starfið á heimasíðu Capacent Ráðninga, www.capacent.is

capacent
RÁÐNINGAR

Borgartúni 27 105 Reykjavík Sími 540 1000